

Date – 29/06/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- Mizorama Myanmar raltlan 32,000 chuangte mitnaute leh kutze thla lak hna July thla chhunga tan turin ruahmanna siam a ni.
- Rajya Sabha MP Pu K. Vanlalvena'n Sairang/Sihhmui atanga Myanmar ramri a Zorinpui thleng rel kawng siam tur ruahmanna preliminary survey zawh a ni tawh a ti.
- Prime Minister Narendra Modi-a'n India ram chu mit natna hri chi khat, Trachoma awm tawh lohna ramah WHO-in a puang tih a sawi.
- Himachal Pradesh-ah ruahsur nasa kaihhnawihah mi 17 an thi tawh.

<><><>

BIOMETRIC ENROLMENT

Mizorama Myanmar raltlan 32,000 chuangte mitnaute leh kutze thla lak hna chu July thla chhung hian tan turin ruahmanna siam a ni.

Home department hotute sawi danin National Informatics Centre (NIC) mithiamte chuan Myanmar mite chhinchhiahna tur atan hian biometric enrollment chungchangah Mizoram district hrang hranga he hna thawktu tur official-te training an pe vek tawh a. Hei hi a taka biometric data khawn khawma online biometric enrollment portal hman zirna a nih rualin he hna atana inpuahchahna pawimawh a ni . Hetih lai hian hmanraw lei belh leh ruahmanna kimchang siamte la hmabak a nih avangin June thla chhungin an tan hman ta lova. NIC mithiamte'n biometric enrollment portal an siam fel vek tawh Myanmar raltlante mitnaute leh kuze thla la a chhinchhiahna tur hi a taka kalpui theih a ni ta niin home secretary Pu Vanlalmawia chuan a sawi a. July thla a he hna hi tan hman ngei tumin inpuahchah mek a nih thu a sawi a. Harsatna lian tham a awm loh chuan tan hman ngei pawh tum a nih thu home secretary chuan a sawi a ni.

Ministry of Home Affairs (MHA)-in enrollment portal atana form a rawn siam chu ramdangmi India rama dan kalha awm thawnkir turte tana siam a nih avangin Myanmar raltlante chhinchhiahna atan a hman theih loh avangin thawnkir leh a ni a. MHA hian form a rawn siamthat leh hnu-ah enrollment portal hi NIC hian a duang tan a, tun hnai khan an siam zo thei ta a ni.

Sorkarin a chhinchhiah dan chuan tun hnai a Myanmar raltlante an rama kir leh hmun danga kal an awm avangin Mizorama awm an tlem hret a. Tun dinhmuna Myanmar raltlan awm zat hi an vaiin mi 32,419 an ni a. Champhai district-ah tam berin mi 13,586 an mikhual a. Lawngtlai district-in dawtin mi 6,017 an awm a, Siaha district-ah mi 5,036 an awm bawk a. Tun hnai a chhuak an awm nualna Aizawl district-ah mi 3,669 awmin an awm tlemna ber Kolasib district-ah mi 129 an awm mek a ni.



PEACE DAY

India sorkar leh MNF te'n inremna an ziah ni, Mizoram-in Remna a neih kum 39-na 'Remna Ni' chu naktuk Thawhtanni hian MZP huaihawtin Lammual-ah lawm a ni dawn a, Chief Minister Pu Lalduhoma chu khuallian ani ang.

Remna Ni-ah hmannaah hian Council of Churches Mizoram General Secretary Rev. Dr.Lalhmangaiha'n hunserh a hmang anga, Sikul hrang hrangin cheraw kanin, zai leh lam leh thusawina bakah lemchan te a awm ang. MZP chuan Mizo mipui zawng zawng he hun hmang tur hian a sawm a, sorkar mi pawimawh, tlawmngai pawl hrang hrang, kohhran hrang hrang, zirna in zawng zawng leh Political Party tinte he hun hmang tur hian a sawm bawk a ni.

Remna Ni chungchangah hian MZP President H. Lalthianghlima chuan Mizoram-in Remna a neih hi kum 39 lai ral tawh mahse a hlutna a la ngai reng,tih sawiin kum 20 teh meuh hreawmna leh harsatna tam tak paltlang in, nunna thapa, mi tam takin an nunna an hlan bakah Mizo mipuite tawngtai chhuah a nih avangin, theih ang tawka lawm hi a phu ani a ti a, zirlaite pheih chu a hlut zia leh Mizote hun pawimawh a nih zia inhrilh thar zel a tul takzet a ni, a ti.



RAILWAYS

Rajya Sabha MP Pu K. Vanlalvena chuan Sairang/Sihhmui atanga Myanmar ramri a Zorinpui thleng rel kawng siam tur ruahman chu preliminary survey zawh a ni tawh a ti.

Pu K. Vanlalvena'n Akashvani Aizawl a hrilh danin Sairang/Sihhmui rel chawlhmun atanga Mizoram chhim tawp Myanmar ramri Zorinpui thlenga Rel kawng siam tura a lo ngen thin tawh chu chak zawka hmalak a nih theih na'n tun hnai khan Railways minister Pu Ashwini Vaishnaw a sawi pui nawn leh a. Sihhmui atanga Zorinpui rel kawng siam tur hian preliminary survey zawh a ni tawh a, map erawh final a la ni lo deuh a ni, a ti. MP chuan Pu Ashwini Vaishnaw hnenah Bairabi leh Sairang inkar rel kawng siam zawh a nih avangin lawmthu a hrilh a, Minister chuan a lawmpui thu a hrilh ve thung niin a sawi a. Sairang Rêl chawlhmun hawn dan tur pawh an sawi dun niin a sawi. Technical thil la endik mek thenkhat a awm avangin official a hawn programme hi siam a la ni rih lova, Railway Engineer lam te chuan Kumin July ni 31 ral hmaa hawn theiha peih turin an insawi a. Rel lo lut tur hi enchhin a ni tawhin Sairang/Sihhmui Rel chawlhmunah hian hlawhtling takin Rel hi a lo tlan lut chhin tawh a. A him leh him loh endiktu Commissioner of Railway Safety pawhin a him tawk a tih thu Ministry of Railways-ah thehlut tawhin, Ministry pawmpuina nghah mek ni.

Survey an kalpui chhin atanga an chhut dan chuan Sairang rel chawlhmun atanga Zorinpui thlenga rel kawng siam tur hi kilometre 223 a thui a ni dawn a. Rel kawng hi siam a nih chuan Mizoram atanga Myanmar rama Sittwe lawng chawlhmun thlenga kalpawhna tur Kaladan Multi-Modal Transit Transport Project (KMMTTP) nena kal thianga tur a ruahman a ni.



MUHCS

April Ni 1 atanga Mizoram Universal Health Care Scheme (MUHCS) kalpui a nih atangin damlo Sing 1, Sang 2 leh 864 enkawl a ni tawh a, damlo enkawl na senso sorkarin a pek chhuah tawh chu chengVbc 15 leh Nuai 9 a tling tawh.

Hriat theih chinah June ni 24 thleng khan Mizoram Universal Health Care Scheme -a mi nawlpui sum chawia inziaklut chhungkaw 7,835 an awm tawh a, pensioner inziaklut 9,310 an awm baw . MUHCS hian sorkara thawh nghet a huam bakah, provisional employee CSS leh Grant in-aid atanga hlawh la te pawh a huam a, India sorkarin health care scheme a duan Pradhan Mantri Jan Arogya Yojana(PM-JAY) beneficiary’s chhungkaw Nuai 2, Sing 1 Sang 9 leh 72 an awm mek a, hemi hnuaia inziaklut te chu MUHCS hnuaiah inziahlulh ve kher a ngai lo a ni.

Mipui nawlpui tana online-a sum chawia inziahlulh theihna hun hi June ni 30 thleng hawn mek a ni a, Inrinni leh naktuk Thawhtanni chu sorkar chawlh a nih avangin offline a sub centre leh hmundanga inziahlulh theih hun chu Zirtawpni khan a tawp a, hetih rual hian online hmangin naktuk thleng hun hawn a la ni.



COVID

Zirtawpni khan Aizawl district a naupang pakhatin Covid-19 hri a kai tih hmuhchhuah a nih leh avangin kumin chhungin Mizoramah 3 hri kai hmuhchhuah an awm tawh.

Mizoramah chuan May thla chawhnu herah khan Covid-19 hri kai 2 hmuhchhuan an ni a. He’ng mi 2-te hi Aizawl district a cheng an ni a, Zoram Medical College & Hospital-a enkawl an nih hnu-ah June ni 5 khan dam takin damdawi-in an chhuahsan leh tawh a ni. Zirtawpni a hri kai hmuhchhuah thar hi enkawl mek a ni a. A natna a lang chhuak lo niin an sawi. Heti chung hian Integrated Disease Surveillance Programme (IDSP) hnathawkte chuan Covid dinhmun hi chik taka an ngaihven reng thu leh central sorkara Ministry of Health & Family Welfare thuneitute nen an inbiak pawh reng thu an sawi a. A tul dan a zira Mizoram pawn atanga lo lutte lo endik pawh kalpui thei turin ruahmanna siam turin an inpeh reng niin an sawi a ni.

(DESK)



JUDO

Mizo nula Lalthumhimi chuan World Police Championship 2025 neih mekah Judo kg 52 huangah Gold Medal a la a. Amah hi Indian Police Sashastra Seema Bal (SSB) tang lai a ni.

Inelna hi Alabama, USA-ah neih ani a, Zemabawk North nula Lalthumhimi hi a rihzawng inang zingah a chungnung ber a. Nikum June thla khan Guwahati-ah All India Police Judo Cluster Championship-ah Lalthumhimi hi a chak ber avangin World Police Championship 2025 hi a khelh theih phah a ni. Lalthumhimi hian National Games 2022 leh North East Games 2016-ah te pawh khan Gold Medal a lo la tawh a, Mizoram tan medal tam tak a hlawh chhuak tawh bawk a ni.

Home Minister Pu K. Sapdanga leh Sports & Youth Services Minister Pu Lalnghinglova Hmar te chuan social media kaltlangin Lalthumhimi an lawmpui thu a sawi a. Pu K. Sapdanga chuan Police nih leh taksa hrisel neih chu a inhmeih tih sawiin, chutiang mi ni zel turduhsakna a hlan a, Lalthumhimi chuan khawvel hriatah Indian Police hming a ti tha a, a sulhnu chu a lawmawmin a chhuanawm takzet a ni, a ti.

(Corr: TSa)

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MANN KI BAAT

Prime Minister Narendra Modi-a'n hriselna lam atanga social security lam thlengin ramn kawng tinrengin hma a sawn chho zel tih sawiin tunah chuan India ram mipui tam zawkin hamthatna chi hrang hrang an chhawr tangkai mek a ni, a ti.

Wawiin Akashvani-a Mann Ki Baat hun a hmannaah he thu hi a sawi a, tun thla ni 21-a International Yoga Day hmanna chungchang tarlangin Pu Modi-a chuan he ni hmannaah hian ramchhung mi vbch tel bakah khawvel pum an tel a ni, a ti a, nitinin yoga hmangtu an pung chho telh telh niin a sawi.

WHO-in India ram chu mit natna hri chi khat, Trachoma awm tawh lohna ramah a puang tih pawh sawiin hetiang dinhmun thlen theihna chhan chu tha thlah lova mi nuai thawh hahna vang a ni, a ti a, Swachh Bharat Abhiyan leh Jal Jeevan Mission-te pawhin hemi kawngah hian an thawh hlawk hle a ni, a ti.

(PM Byte)

(NSD)

<><><>

Himachal Pradesh-ah fur ruah sur nasa kaihhnawihah mi 17 an thi tawh a, cheng vbch tam tak hu thil a tichhe tawh bawk.

Akashvani Corr sawi danin, Shimla khawpui tiamin Himachal Pradesh pum deuh thawha nasa takin ruah a sur a, lui hrang hrangte pawh ,lian chho mekin leimin vangin inkalpawhna kawng 37 a ping mek bawk a ni.

Uttarakhand-ah pawh ruahsur nasa-in khawsak phung a tikhaihlak nasa hle a, Uttarkashi dist-ah ruah bawhawk sur-in hnathawktu mi 9 a len bova, mibo-te zawn hna hi ngawrh taka thawh mek a ni.

(NSD)

